

NOTA PRENSA

RTPA PREPARA UNA PROGRAMACIÓN ESPECIAL CON MOTIVU DE LA SELMANA DE LES LLETRES ASTURIANES 2026

- RTPA estrena esti miércoles los documentales **Taresa Cónsul: la lluz de la solombra** y **N'Asturies la gaita siempre ta**, dos producciones que ponen en valor la memoria cultural y musical d'Asturies.
- La programación complétase el viernes cola emisión en directo del actu institucional del Día de les Lletres Asturianas dende'l Teatru Campoamor y el concierto La banda sonora de la oficialidá.

Xixón, 5 de mayu del 2026

La Radiotelevisión del Principáu d'Asturies (RTPA) va desenvolver una programación especial con motivu de la XLVII Selmana de les Lletres Asturianas, que nel añu 2026 ta dedicada a Taresa Cónsul, considerada la primer dramaturga conocida en llingua asturiana, y al teatru popular o costumista asturianu. Esta edición coincide, amás, col avance del espediente pa la declaración d'esti xéneru escénicu como Bien d'Interés Cultural de calter inmaterial.

El serviciu públicu de comunicación del Principáu d'Asturies va reforciar la cobertura informativa d'esti acontecimientu cultural, atendiendo a les principales novedaes institucionales, patrimoniales y artístiques venceyaes a la Selmana, asina como a la recuperación de la figura de Taresa Cónsul y al reconocimientu del teatru asturianu como fenómenu escénicu y social de tradición bien fonda.

Los distintos programes de **Televisión del Principáu d'Asturies (TPA)** van incorporar conteníos divulgativos, reportaxes y entrevistes centraes nel teatru n'asturianu, la so evolución histórica, la contribución de les muyeres a la escena asturiana, la vitalidá actual del sector y el procesu de profesionalización de les artes escéniques nel país.

Como pieza central de la programación, el miércoles va emitise a les 22:30 hores el documental **Taresa Cónsul: la lluz de la solombra**. Un viaxe al orixe de la nuesa llingua que rescata la voz de Taresa Cónsul, primer dramaturga n'asturianu, y reivindica na Selmana de les Lletres Asturianas, el teatru popular como memoria viva d'un pueblu. Un docudrama que parte de los últimos díes de la monxa y escritora Taresa Cónsul pa rescatar del olvidu una de les voces más antigües del teatru n'asturianu. Al traviés de la representación de la so obra *El Entremés*,

l'espectador métese dafechu nes reflexones de l'autora y nel contestu escénicu del so tiempu, acompañáu pol análisis d'espertos que revelen la repercusión, la singularidá y la vixencia del so legáu.

A continuación, a les 23:00 hores, va emitise'l documental ***N'Asturies la gaita siempre ta***, una producción que fai un percorríu completu pola cultura asturiana de la gaita, atendiendo a la so dimensión histórica, social, pedagóxica y artesanal, amás de la so proyección contemporánea y del procesu de reconocencia institucional como Bien d'Interés Cultural de calter inmaterial.

El documental parte de los oríxenes de les escueles de música tradicional y del pasu d'un aprendizamientu familiar y oral a un modelu estructuráu d'enseñanza, cola participación de figures como Xuacu Amieva, José Ángel Hevia o Santi Caleya. Tamién aborda'l presente y futuru de la formación musical al traviés de testimonios de músicos como Flavio Benito o David Varela, y dedica un bloque específicu a la construcción de gaites, con artesanos como Berto Varillas, Chus Solís o Iván López, qu'axunten tradición, innovación técnica ya investigación acústica. La pieza incorpora amás una mirada al papel de les muyeres na música tradicional asturiana, con Keti García y Conchi Bernardo, y sorraya la importancia de la protección institucional d'un patrimoniu que nun queda namás nel instrumentu, sinón que comprende la música, la fabricación, la tradición oral y les práctiques sociales venceyaes a la gaita.

El programa completa'l so relatu con actuaciones grabaes na Sala de Pintures de Llaboral Ciudá de la Cultura, onde participen representaos del panorama internacional como José Manuel Tejedor, Fred Morrison, David Bellas, Jean-Pierre Van Hees y Zampognòrchestra, reforciando la proyección universal d'esti patrimoniu vivu. Un documental realizáu nel marcu de les 'Xornaes de la Música Tradicional Asturiana: Escueles de música tradicional y retos de la cultura asturiana de la gaita' cola collaboración de la Consejería de Cultura, Política Llingüística y Deporte del Principáu d'Asturies.

La programación especial complétase coles siguientes emisiones destacaes el vienres 8 de mayu:

- Emisión en directu del actu institucional del 47 Día de les Lletres Asturianas dende'l Teatru Campoamor d'Uviéu, a les 19 hores.
- Estrenu de la temporada nueva de *Mochileros de primavera* a les 22:30 hores, con Camilo acompañáu de Ferla Megía nel primer episodiu.
- Emisión del conciertu *La banda sonora de la oficialidá* a les 23:30 hores.

Programación especial en RPA

Radio del Principáu d'Asturies (RPA) súmase a la celebración de la Selmana de les Lletres Asturianas con una programación especial que refuerza'l compromisu del serviciu públicu cola promoción y normalización de la llingua asturiana.

La emisora autonómica preparó 25 miniespacios, d'ente 3 y 5 minutos de duración, que van emitise de llunes a viernes depués de los boletinos horarios de les 11:00, 13:00, 17:00, 18:00 y 19:00 hores, y que van contar con un espaciu específicu na páxina web de RTPA.

RPA va ufiertar una cobertura especial de los principales actos del programa, con atención destacada al Día de les Lletres Asturianas, el viernes 8 de mayu, y a los eventos más relevantes d'una Selmana que se celebra del llunes 4 al domingu 10 de mayu y que va incluyir más d'una ventena d'actividaes en 14 conceyos asturianos.

La radio pública asturiana va incorporar tamién conteníos específicos nos servicios informativos, programes culturales y espacios especializaos, con entrevistes, reportaxes y conexiones en directu dende distintos puntos d'Asturies. L'oxetivu ye averar a la ciudadanía'l valor de la creación en llingua asturiana y el so papel na identidá cultural del territoriu.

Con esta programación, RTPA afianza'l so compromisu cola promoción, normalización, usu del asturianu, y difusión de la llingua y la cultura asturiana, contribuyendo a la visibilidá del nuestru patrimoniu inmaterial y al fortalecimientu del sector audiovisual, creativu y cultural d'Asturies.

L'actu institucional *del 47 Día de les Lletres Asturianas* va poder siguise al traviés de los canales de televisión A7 y A8, na **web de RTPA y nes sos plataformes dixitales** (YouTube, Facebook, Instagram y X). Amás, la programación especial va tar disponible en **RTPA a la carta**.